

無相思塵論  
觀所緣緣論  
觀所緣緣論釋

陳三藏真諦譯

唐三藏法師玄奘奉詔譯  
唐三藏法師義淨奉制譯



清刻龍藏佛說法變相圖

三論同卷

無相思塵論  
觀所緣緣論  
觀所緣緣論釋

無相思塵論

拔九

陳三藏真諦譯造

若說隣虛是根等因不似起故非境如根識似聚起不從彼生聚無有體譬如二月由此二義外物非塵有說隣虛聚成萬物識似彼起故立爲塵隣虛體相若是實有識不似故非境如塵隣虛如塵則識無別若言相異則識不同異相在假故體非真隣虛體量衆處無別若除隣虛萬識不起

投九

是故萬物悉是假名於內塵相如外而顯立爲識塵識似現故是識緣緣隨生決定共立功能令次第起二根共生勝能爲根於識無礙更互爲因勝能爲塵互生無始若有人執眼等六識緣外境起是人或分別隣虛爲境是識因故或分別隣虛聚爲境似聚識起故塵者何相若識能了其體相如其體相識起是故說此名塵隣虛無此事若隣虛實是識因譬如五根是隣虛非塵若爾隣虛聚應是境如聚識起故雖復如此如其相起識不從此生是故聚亦非塵何以故若塵能生識似其體相可信爲塵何以故可說此塵爲識生緣故聚者則不如此非實有故譬如二月由眼根亂識似二月起二月非識境界實無有故聚亦如此離隣虛無有實體故

聚非識境界是故外塵由此二義非識境界一一分不具故有諸師說隣虛聚集集成萬物有多種相具足立根爲境界何以故有別相生證智非但隣虛及隣虛聚是故於隣虛及隣虛聚中有相爲六識作境隣虛相者非塵譬如堅等隣虛中有堅濕熟動觸此物實有非眼識境界眼識不如其起故隣虛中萬物亦如此何以故隣虛者於萬物中若生識是識則無差別以萬物中隣虛無有異故若汝言由相差别故生識異瓶等諸物相貌不同緣此相起故識有異是義不然何以故如此相貌差別於瓶等假名物中不無隣虛實物中則無隣虛體量不異故於萬物中隣虛體量所謂圓細無有差別是故萬物相貌非是實有是假名有是假名相者謂瓶等諸物若

除隣虛似瓶等識不生故實物者若併相應法似實物識不滅如未析時於瓶中五塵識生析竟五塵識亦不滅故五塵等是實有由此隣虛及聚萬物不能生識是故外塵非識境界若爾何法名塵於內塵相如外顯現是名識塵實無所有於內識中衆生亂心分別故起六塵分別此分別如在於外如此顯現是四緣中名識緣緣以是識體相故由此識生故所以者何是識作內塵相從內塵生具二法故是故內塵名境界問曰如塵起識是亦可然內塵是識一分共一時起云何得作緣緣答曰立緣緣者識緣此生無有二故緣者或一時共起能成餘法從他生決定隨逐生不生故問曰若次第生所緣能緣相云何答曰因在前果在後果隨因因不隨果若因

有果必有若因無果必無果隨因或有或無是名因果相復次爲安置功能次第故立所緣能緣是似塵識次第起爲生似果起功能識相續問曰若內塵是識緣緣是緣生經當云何釋經言依根緣色眼識得生廣說如經答曰功能體相能共造果說名爲根問曰根者體用云何答曰勝能爲體此體因何法可比度知有由生自故是其勝能可得了別非有四大色此功能於識中無有妨礙此功能在識中離識其體不可顯示如我所立根與汝所立根同功能爲體此有何異如此功能及似塵相更互爲因如此功能及似塵相生從無始來悉爾依功能說名根緣內塵相名境是亂識不可言其相得生此法更互爲因亦無有始何以故或功能成熟故起似塵識

或似塵識故功能得成識者或異二或不異  
二或不可說如此內塵具二法故可爲識境

無相思塵論